

दिनांक 19.04.2025

समय: 18.45 बजे

आकाशवाणी जयपुर—अजमेर
प्रादेशिक समाचार

- मुख्यमंत्री भजनलाल शर्मा कह्यो— साल 2027 ताई किसानां ने दिन मांय ई बिजली मुहैया करायी जावेला।
- अमेरिका रा उपराष्ट्रपति जे.डी. वेंस 21 अप्रैल ने भारत पधारेला—तीन दिन रा जयपुर प्रवास रो कार्यक्रम।
- विश्व लिवर दिवस रे मौके न्यारा—न्यारा जागरुकता कार्यक्रम—स्वस्थ जीवन शैली अपनावण माथे जोर
- राज्य मांय तेज गर्मी ऊं काल ऊं साता मिलण रा आसार— पारो 2 ऊं 4 डिग्री सेल्सियस ताई री संभावना।

000

मुख्यमंत्री भजनलाल शर्मा आज जयपुर जिला रा गोविंदगढ़ अर सीकर जिला रा सरगोठ, रींगस, पलसाना अर बाजौर मांय जनसभावां ने सम्बोधित कीनी। सरगोठ री सभा मांय श्री शर्मा कह्यो के सरकार जनता ऊं करी ज्या सगळा वायदा पूरा करण री लगातार कोशिश कर रही है। मुख्यमंत्री कह्यो के साल 2027 ताई काश्तकारां ने पाणत सारु दिन मांय ई बिजली मुहैया करा दी जावेला।

.....

इण ऊं पैली मुख्यमंत्री जयपुर कने आमेर मांय राख्यी ज्या एक कार्यक्रम मांय कह्यो के सरकार हर हलका रो विकास करणो तैय कीनो है।

.....

मुख्यमंत्री आज शेखावाटी हलका रो तीन दिन रो दौरा सुरु कीनो। वां रो काल झुंझुनूं रा सर्किट हाउस मांय जनसुणवाई रो कार्यक्रम है। ई ई सागे ई वे पिलानी मांय यमुना नदी रा पाणी ऊं जुड़्या करार री विगतवार प्रोजेक्ट रिपोर्ट सारु बणायी ज्यी भेळी टास्क फोर्स री दूजी मीटिंग री सदारत करेला। ध्यानजोग है के यमुना जल समझौता रा पहला दौर मांय ताजेवाला हैड ऊं राज्य मांय पाणी लावण बाबत पाणी रा बहाव री प्रणाली सारु भेळी डीपीआर बणावण माथे एक राय बणी है। राजस्थान अर हरियाणा रा अहलकारां री दूजी मीटिंग 25 अप्रैल ने हिसार मांय व्हेवणो तैय करी ज्यो है। इण ऊं पैली जिला रा प्रभारी मंत्री अविनाश गहलोत आज झुंझुनूं पूग र मुख्यमंत्री रा दौरा री तैयारियां रो जायजो लीनो।

000

अमेरिका रा उपराष्ट्रपति जेडी वेंस 21 अप्रैल ने भारत रा दौरा सारु पधारेला। प्रधानमंत्री नरेंद्र मोदी सागे मुलाकात पाछे वे तीन दिन रा प्रवास सारु जयपुर पधारेला। श्री वेंस रो जयपुर मांय आमेर महल रो दौरा करण अर एक बिजनेस समिट ने संबोधित करण रो कार्यक्रम है। 23 अप्रैल ने वे आगरा मांय ताज महल ने निरखेला। वां रो 24 अप्रैल ने संवारे जयपुर ऊं वाशिंगटन जावण रो कार्यक्रम है। अमेरिका रा उपराष्ट्रपति रा दौरा ने ध्यान राखता थकां 21 अर 22 अप्रैल ने सैलाणी आमेर रा महल ने नी निरख सकेला।

मुख्यमंत्री भजनलाल शर्मा जे.डी. वेंस रे जयपुर आवण रा कार्यक्रम ने देखता थकां आज वां रा रेहवास माथे अहलकारां सागे मीटिंग कर र हिफाजत रा पुख्ता बंदोबस्त करण अर दूजी तैयारियां पूरी करण रा हुकम दीना।

000

केन्द्रीय संस्कृति अर पर्यटन मंत्री गजेन्द्र सिंह शेखावत आज जैसलमेर रा सोनार किला रो दौरा कर र पुरातत्व सर्वेक्षण महकमा रा अहलकारां सागे न्यारा-न्यारा मुद्दां माथे बातचीत कीनी। केन्द्रीय मंत्री किला ने बचावण अर रख-रखाव रा बारा मांय ज़रूरी हुकम दीना। वे किला माथे जावण सारु दूजा गेला रा बारा मांय ई विचार कीनो। ई दौरान पोकरण रा विधायक महंत प्रताप पुरी ई मौजूद हा।

000

ज़िला मांय बानसूर रा विधायक देवीसिंह शेखावत आज केन्द्रीय मंत्री अर्जुनराम मेघवाल सागे दिल्ली मांय मुलाकात कीनी। श्री शेखावत कानून मंत्री ने कोटपूतली-बहरोड़ मांय सेशन कोर्ट खोलण सारु मांग पानो संप्यो।

000

.....

000

आज विश्व लिवर दिवस है। प्रधानमंत्री नरेन्द्र मोदी सगळं ऊं खाण-पीण ऊं जुड़ी संयमित आदतां अर स्वस्थ जीवन शैली अपनावण री अपील कीनी है। सोशल मीडिया पोस्ट रे ज़रिए श्री मोदी न्हाना-न्हाना बदलावां रा महत्त्व माथे जोर दीनो है। ई मौके केन्द्रीय स्वास्थ्य मंत्री जेपी नड्डा कह्यो के तेल काम लेवणो कम करण सरीखा छोटा उपाय मोटा बदलाव ला सके है। वे मोटापा ऊं बचाव रा बारा मांय जाग जगावण सागे स्वस्थ भारत बणावण बाबत कह्यो। विश्व लिवर दिवस रे मौके केन्द्रीय गृह मंत्री अमित शाह कह्यो के सरकार देश मांय स्वास्थ्य देखभाल सारु समग्र नज़रिया सागे काम कर रही है। वे आज नई दिल्ली मांय राखी ज्या **स्वस्थ लिवर-स्वस्थ भारत** कार्यक्रम मांय बोल रह्या हा। वे कह्यो के लारला दस साल मांय देश रा स्वास्थ्य ढांचा मांय लगातार सुधार व्ह्यो है। श्री शाह बतायो के साल 2014 मांय स्वास्थ्य बजट 37 हजार करोड़ रुपया रो हो, जो अब बध र एक लाख 27 हजार करोड़ रुपया व्हे ग्यो है। श्री शाह चोखा स्वास्थ्य सारु पौष्टिक आहार, ज़रूरी नींद अर कसरत करण माथे खास जोर दीनो।

.....

विश्व लिवर दिवस रे मौके प्रदेश मांय ई भांत-भांत रा कार्यक्रम राखी ज्या। पाली रा सरकारी बांगड़ अस्पताल मांय लोगां ने जिगर ऊं जुड़ी बीमारियां रा बारा मांय जाणकारी दीरीजी।

000

जैसलमेर मांय लारला दिनां कृत्रिम गर्भाधान री तरकीब रे ज़रिए राज्य पक्षी गोडावण रो तीजो चूजो जन्म्यो। ई पाछे राज्य मांय अब गोडावण री तादाद 55 व्हे ग्यी है। ई सागे ई भारत ई तरकीब ऊं गोडावण ने जन्म देवण वाळो दुनिया रो पहलो देश बण ग्यो है।

.....

000

राज्य मांय तावड़ा रा कोप ऊं काल थोड़ी साता मिलण रा आसार है। मौसम विभाग रे मुजब आज जोधपुर अर बीकानेर संभाग मांय कटे-कटे आंधी आवण या जोरदार बायरो बाजण रा आसार है। मौसम केन्द्र जयपुर रा निदेशक राधेश्याम शर्मा बतायो के काल ऊं पारो 2 ऊं 4 डिग्री सेल्सियस उतरण री संभावना है।

.....

ई बीचे जोरदार तावड़ा ने ध्यान राखता थकां श्रीगंगानगर ज़िला मांय सरकारी अर गैर-सरकारी स्कूलां मांय विद्यार्थियां सारु स्कूल संवारे साढे सात ऊं ग्यारह बज्यां ताई खोलण रा हुकम दिया ज्या है।

000

इंडियन प्रीमियर लीग-आईपीएल क्रिकेट रा तैत आज जयपुर मांय राजस्थान रॉयल्स अर लखनऊ सुपर जायंट्स बीचे मुकाबलो व्हेला। ओ मुकाबलो अब ऊं थोड़ी देर पछे साढे सात बज्यां सवाई मानसिंह स्टेडियम मांय सरु व्हेला। आईपीएल रा आज व्हे रह्या एक और मुकाबला मांय डेल्ही कैपिटल्स गुजरात टाइटंस सामी 204 रन बणावण री चुनौती पेश कीनी। डेल्ही कैपिटल्स री टीम तैय बीस ओवर रा खेल मांय 203 रन बणाया अर वां रा आठ बल्लेबाज आउट व्ह्या।

000

राजस्थान लोक सेवा आयोग री ओर ऊं कृषि अधिकारी भर्ती परीक्षा 2024 काल अजमेर मांय ली जावेला। एक पारी मांय व्हेवण वाळी ई परीक्षा सारु 39 केन्द्र बणायी ज्या है। आयोग रा सचिव रामनिवास मेहता बतायो के ई परीक्षा रे मार्फत कृषि अधिकारी रा 52 ओहदां माथे भर्ती करी जावेला। वे बतायो के आ भर्ती परीक्षा देवण सारु करीब तेरह हजार उम्मीदवार अर्जियां दीनी। ई बीचे राजस्थान कर्मचारी चयन बोर्ड कानी ऊं ली जावण वाळी चतुर्थ श्रेणी भर्ती परीक्षा सारु अर्जी देवण री आज आखिरी तारीख है अर हाल तांई 22 लाख ऊं बत्ता उम्मीदवार अर्जियां दे चुक्या है। ई भर्ती परीक्षा रे मार्फत 53 हजार 749 ओहदां माथे चतुर्थ श्रेणी कर्मचारियां ने नौकरी दी जावेला। आ परीक्षा ई साल 18 ऊं 21 सितम्बर बीचे व्हेला।

000

काल ईस्टर रो पर्व मणायो जावेला। ओ दिन ईसा मसीह रे ओजू जीवता व्हेवण री याद मांय मणायो जावे है। इण ऊं पेली शुक्रवार ने प्रभु यीशु रा बलिदान री याद मांय गुड फ्राइडे मणायी ज्यो हो। राष्ट्रपति द्रौपदी मुर्मू ईस्टर री पैली वाळी सांझ रे मौके सगळां ने शुभकामनावां दीनी है। राष्ट्रपति कह्यो के ओ पर्व निस्वार्थ प्रेम अर सेवा रो संदेश देवण सागे जीसस क्राइस्ट रा बलिदान, क्षमा अर त्याग रा मूल्यां री सीख देवे है। ई मौके श्रीमती मुर्मू सगळा ऊं शांति ने बधावो देवण री अरज कीनी।

000